

**UCAPAN PERDANA MENTERI DI ISTIADAT  
MERASMIKAN TUGU KENANG-KENANGAN  
BAPA MALAYSIA, Y.T.M. TUNKU ABDUL  
RAHMAN PUTERA AL-HAJ. DI HADAPAN  
BANGUNAN URUSETIA, KOTA KINABALU,  
SABAH PADA 31HB JULAI, 1972**

Saudara Pengerusi Majlis, Y.T.M. Tunku Abdul Rahman Putra Al-Haj, Bapa Malaysia dan Tun Sharifah Rodziah, Y.A.B. Tun Datu Haji Mustapha dan Toh Puan Hajjah Rahma, Y.B. Menteri-menteri dan Pembantu-pembantu Menteri, Dif-dif yang terhormat.

Saudara-saudara sekalian,

Saya bersyukur ke hadrat Allah Subhanahu Wata'ala kerana dengan izinNya saya dapat datang bersama-sama menghadiri peristiwa bersejarah pada petang ini.

Disamping itu, sukalah saya menyatakan perasaan setinggi-tinggi terimakasih kepada saudara saya, Y.A.B. Tun Datu Haji Mustapha kerana memberi saya penghormatan sekali lagi pada upacara ini.

Semasa lawatan saya ke man tahun sudah, saya merasa bertuah kerana diberi penghormatan meletakkan batu asas dan mengisytiharkan projek Tugu Kenang-kenangan kepada Bapa Malaysia dan pemimpin kita yang dikasihi, Y.T.M. Tunku Abdul Rahman Putra Al-Haj.

Majlis hari ini merupakan kemuncak dari keghairahan hati kita semua terutama kepada rakyat di Sabah ini. Lebih-lebih pula dengan adanya Y.T.M. Tunku hadir bersama-sama dengan kita pada upacara pembaktian Tugu ini sebagai tanda penghargaan abadi daripada rakyat Malaysia di Sabah atas jasa-jasa beliau yang tidak ternilai kepada bangsa dan negara.

Sesungguhnya peristiwa hari ini mengandungi makna yang amat besar dalam sejarah Negeri Sabah khasnya dan Malaysia amnya kerana inilah pertama kali rakyat mana-mana bahagian Malaysia menunjukkan rasa penghargaan yang begitu tinggi kepada penganjur ulung dan Bapa Kemerdekaan Malaysia yang kita kasihi itu.

**I Perdana Menteri Malaysia, 1957-1970.**

Sebenarnya, Tugu Kenang-kenangan ini hanyalah simbolik sahaja kerana pada pendapat saya tidaklah dapat kita menilai jasa dan sumbangan Y.T.M. Tunku sebagai patriot dan nasionalis Malaysia. Semuanya itu akan diukir dengan tinta emas dalam sejarah tanahair kita untuk menjadi pengajaran kepada jenerasi akan datang.

Meski pun beliau tidak dapat lagi menumpukan masanya dan turut bersama-sama kita dalam pergolakan politik tanahair, namun tidaklah kecil khidmat dan jasa beliau menegakkan syiar Islam yang maha suci dan secara tidak langsung mengharumkan nama Malaysia. Tugas beliau sebagai Setiausaha Agung Sekretariat Islam adalah satu bakti suci dan juga pengorbanan; namun berkat ketabahan, keazaman dan kejujuran hati beliau, dan dengan izin Allah, tanggungjawab yang berat itu dapat dilaksanakan dengan penuh kejayaan.

Dua minggu lagi, satu projek beliau yang penting iaitu Islamic International News Agency akan dilancarkan penubuhannya di Ibu Negara Kuala Lumpur dan kita turut berbangga kerana Malaysia menjadi tuan rumah kepada pertemuan yang penting itu. Kita mendoakan semuga Tunku mencatatkan kejayaan-kejayaan yang lebih besar dalam tempuh perkhidmatannya di Jeddah itu.

Dalam konteks yang lebih luas, saya rasa Tugu ini juga melambangkan cita-cita kemerdekaan negara kita Malaysia yang telah diperjuangkan oleh rakyat dengan penuh tabah dan semangat keperwiraan. Kenang-kenangan kita dibawa kembali kepada detik-detik sejarah semasa kita mula-mula berjuang menuntut kemerdekaan dari penjajah, dan kemudian menghadapi berbagai cabaran yang mana dengan izin Allah dapat kita atasi. Dari itu juga, kita mendapat inspirasi bagi menghadapi zaman baru ini sambil membaharui azam kita untuk mencapai kejayaan yang lebih cemerlang pada masa hadapan.

Saudara-saudara sekalian,

Saya berasa amat terharu melihat semangat bakti rakyat Malaysia di Sabah dan rasa keikhlasan mereka mengurbankan wang ringgit untuk mendirikan tugu Kenang-kenangan Bapa Malaysia ini. Sukalah saya mengambil peluang ini menyatakan

setinggi-tinggi tahniah kepada mereka sambil berharap semoga Tugu ini disifatkan sebagai lambang hasrat perpaduan rakyat di Sabah ini khasnya dan di seluruh Malaysia amnya.

Peristiwa hari ini juga adalah menjadi petunjuk dan pengajaran bagi orang ramai terutama kepada jenerasi muda. Mereka hendaklah faham sebenarnya bahawa kemerdekaan negeri-negeri di Malaysia Timur iaitu Sabah dan Sarawak ialah hasil dari perjuangan rakyat kedua-dua negeri itu sendiri. Nyatalah bahawa hasrat suci itulah yang mendorong rakyat berjuang hingga kemerdekaan Sabah dalam Malaysia ini menjadi kenyataan.

Tetapi, tidaklah dilupakan bahawa perpaduan rakyat di Sabah menuntut kemerdekaan adalah berkat bimbingan dan ketuaan yang jujur dan ikhlas dari pemimpin-pemimpin Sabah dan Sarawak sendiri dan di sini khasnya sukalah saya mencatatkan nama saudara kita, Y.A.B. Tun Datu Haji Mustapha.

Tidak siapa yang boleh menafikan bahawa beliau adalah penganjur dan pemimpin besar dalam perjuangan menuntut kemerdekaan bagi negeri Sabah ini. Saya percaya saudara-saudara sekalian dan rakyat Sabah seluruhnya menghargai penuh jasa-jasa dan khidmat bakti beliau itu yang kekal dalam sejarah negara kita. Sungguh tepatlah saudara kita Tun Datu Haji Mustapha diberi gelaran "Bapa Kemerdekaan Sabah dalam Malaysia". Dan dengan yang demikian, amatlah wajar pada satu masa kelak rakyat Sabah membalas jasa bakti Y.A.B. Tun itu dan mengenangkan pengorbanan dan perkhidmatannya dengan mengadakan satu tugu untuk beliau pula.

Saudara-saudara sekalian,

Hari ini kita boleh berbangga kerana kita telah berjaya menyatupadukan rakyat yang berbilang keturunan, terutama sekali rakyat Bumiputra yang berasal dari satu rumpun bangsa. Di mana-mana jua rakyat Malaysia adalah sama dan tidak ada perbezaan antara rakyat yang bermastautin di Malaysia Timur dengan yang bermastautin di Malaysia Barat.

Namun, kita wajiblah memelihara dan memperteguhkan kestabilan yang wujud pada masa ini supaya dapat kita mencapai kemakmuran, keamanan dan kebahagiaan hidup buat kita hari ini dan untuk jenerasi-jenerasi akan datang. Saya memberi jaminan kepada rakyat Malaysia di Sabah ini bahawa Kerajaan Pusat

sentiasa menitikberatkan dan memelihara hak-hak kebebasan sosial antara rakyat Malaysia seluruhnya dengan tidak membezakan Malaysia Timur atau Barat.

Perpaduan rakyat adalah satu syarat mutlak kerana tidak dapat dinafikan bahawa rancangan-rancangan Kerajaan tidak dapat dilaksanakan dengan jayanya sekiranya perpaduan rakyat terancam dan keselamatan negara tidak terjamin.

Kita bersyukur kepada Allah kerana Sabah adalah bebas dari ancaman Kominis militant hari ini. Bagaimanapun, kita mestilah sentiasa waspada akan pengaruh-pengaruh buruk dari anasir-anasir anti-nasional yang cuba meretakkan dan memecahkan perpaduan rakyat. Dengan terdapatnya kestabilan ekonomi dan dengan terjaminnya keselamatan negara, kebahagiaan dan kemakmuran hidup rakyat akan berkekalan.

Berkat adanya hubungan baik antara Kerajaan Negeri dan Pusat, saya dapati segala-galanya berjalan dengan baik dan inginlah saya merakamkan ucapan terimakasih yang tidak terhingga kepada semua pihak, khasnya kepada Y.A.B. Tun Datu Mustapha. Saya penuh yakin Y.A.B. Tun dan rakan-rakannya akan terus menjalankan usaha-usaha pembangunan Sabah dengan penuh tanggungjawab dan didikasi.

Saya juga sukacita semasa lawatan D.Y.M.M. Seri Paduka Baginda Yang Dipertuan Agung dan Raja Permaisuri Agung baru-baru ini, rakyat di Sabah telah memberikan sambutan yang sungguh meriah serta menunjukkan taat setia dan kasih sayang kepada Seri Paduka Baginda berdua. Dengan lain perkataan, rakyat di mana-mana jua menjunjung tinggi prinsip-prinsip Rukunegara.

Saudara-saudara sekalian,

Bagi mengakhiri ucapan ini, saya sekali lagi mengucapkan tahniah kepada Kerajaan Negeri dan rakyat Sabah kerana memberi setinggi-tinggi penghormatan kepada Bapa Malaysia kita dengan membina Tugu Kenang-kenangan ini. Saya dengan nama Allah yang Amat Pemurah dan Pengasih, mengisytiharkan pembaktian Tugu Y.T.M. Tunku Abdul Rahman Putra Al-Haj, Bapa Kemerdekaan Malaysia, sebagai kenang-kenangan kepada jasa beliau yang akan kekal zaman berzaman itu.